

# Канон святителю и чудотворцу Николаю, архиепископу Мир Ликийских

Празднование 9/22 мая, 6/19 декабря  
Творение Феофаново

## **Тропарь, глас 4:**

Правило веры и образ кротости, воздержания учителя яви тя стаду твоему, яже вещей Истина: сего ради стяжал еси смирением высокая, нищетою богатая. Отче священноначальниче Николае, моли Христа Бога спастися душам нашим.

## **Глас 2-й**

### **Песнь 1**

**Ирмос:** Во глубине постла иногда фараонитское всевоинство преоруженная сила; воплощесе же Слово всезлобный грех потребило есть, препрославленный Господь, славно бо прославися.

**Припев:** Святителю отче Николае, моли Бога о нас.

Венценосец Престолу Христову, премудре Николае, предстоя со ангельскими воинствы, просвещение ми даруй, озаряющее души моя омрачение, яко да восхваляю радуяся твою, всеблаженне, память.

**Слава:** Прославляяй вся Господь, того славящия, тя верным прибежище даде, напастей избавляюща притекающия к твоему крову, Николае, и призывающия тя верою и любовью, преславне.

**И ныне:** Сравнитися желание ми вложив змий вселукавый, Содетелю, яко пленника восхити. Тобою же, Всечистая, воззван бых, обожився истиннейше: Ты бо, о Богомати, мене Обожившаго родила еси.

### **Песнь 3**

**Ирмос:** Процвела есть пустыня, яко крин, Господи, языческая неплодящая церковь, пришествием Твоим, в нейже утвердися мое сердце.

**Святителю отче Николае, моли Бога о нас.**

Николае блаженне, Владыки искренний ученик ты быв, спасаеши к тебе притекающия от лютых бед и смерти горькия.

**Слава:** Очисти рабы Твоя, грехов оставление яко Благ даруя, Николая, Твоего угодника, яже к Тебе ходатайствы, Многомилостиве.

**И ныне:** Утоли смущение души моя, Пречистая, и жизнь окорми, Всесвятая, Бога рождающая, в Немже утвердися сердце мое.

### **Седален, глас 8-й**

Возшед на высоту добродетелей, божественными оттуду, отче, озарився сиянии чудес, пресветел воистинну явился еси миру пастырь, нам в напастех сый предстатель непобедим. Темже, преславно врага победив, лжу отгнал еси и человеки спасл еси от смерти, Николае, моли Христа Бога, грехов оставление даровати чтущим любовию святую память твою.

**Слава, и ныне:** Яко Деву и едину в женах, Тя, без семени рождающую Бога плотию, вси ублажаем роди человечества: огонь бо вселися в Тя Божества, и яко младенца доиши Зиждителя и Господа. Тем ангельский и человеческий род, достойно славим пресвятое Рождество Твое, и согласно вопием Ти: моли Христа Бога, согрешений оставление даровати поклоняющимся верою пресвятому Рождеству Твоему.

## **Песнь 4**

**Ирмос:** Пришел еси от Девы, не ходатай, ни Ангел, но Сам, Господи, воплощся, и спасл еси всего мя человека. Тем зову Ти: слава силе Твоей, Господи.

**Святителю отче Николае, моли Бога о нас.**

Приблизився чисте зарям духовным, светоносец был еси, мира просвещая концы, всем предстательствуя, и вся спасаая верою, к тебе притекающия.

Избавляя от смерти, яко явился еси первее, Николае, юноши, преподобне: тако и ныне мя спаси от всякаго обстояния, и напастей и бед, всеблаженне.

**Слава:** Облистал еси добродетелей сияньми, всеблаженне, подражатель преизряднейший твоего Владыки быв, спасаеши же, призываемь, благоговением и любовью тя славящия.

**И ныне:** Найде на Тя Владыка твари воплощаемь, и спасаая, яко благоутробен, всего мя человека: темже вернии Богородицу Тя славим.

## **Песнь 5**

**Ирмос:** Просвещение во тме лежащих, спасение отчаянных, Христе Спасе мой, к Тебе утреннюю, Царю мира, просвети мя сиянием Твоим: иного бо, разве Тебе, бога не знаю.

**Святителю отче Николае, моли Бога о нас.**

Боголепным житием, треблаженне просвещаемь, осужденныя неправедным изречением умрети, представ, избавил еси, Владыце Христу зовущия: иного бо, разве Тебе, бога не знаем.

**Слава:** На небесех присносущную славу ныне зря, и неизглаголанная и божественная зари светлейшими наслаждаяся сиянии, покрый мя предстательством твоим, преподобне, угодниче Христов всечестне.

**И ныне:** Да Твой взыщеша образ, погребенный страстьми, Спасе, небесных утаився сил, воплощся из Девы, явился еси Тебе зовущим: иного, разве Тебе, бога не знаем.

## **Песнь 6**

**Ирмос:** В бездне греховней валяясь, неизследную милосердия Твоего призываю бездну: от тли, Боже, мя возведи.

**Святителю отче Николае, моли Бога о нас.**

Иже победы, Николае, венец на Твоем версе достойно положиши: яко победитель убо изряднейший, ты призывающия спаси .

**Слава:** Умерщвлена мя, блаженне, согрешеньми, и страстей треволненными погружаема, явился спаси, направляя ко пристанищу Божественных воли.

**И ныне:** На Тя надежды возложих, Мати Приснодево, спасения моего, и Тя предстательницу полагаю жизни, твердо же и непоколебиму.

## **Кондак, глас 3-й**

В Мирех, святе, священнодействователь показался еси, Христово бо, преподобне, Евангелие исполнив, положил еси душу твою о людех твоих, и спасл еси неповинных от смерти. Сего ради освятился еси, яко великий таинник Божия благодати.

## **Икос**

Воспоим ныне святителя песньми, мирским людем пастыря и учителя, да молитвами его просветимся: се бо явился чист весь, нетленен, духом, Христу принося жертву непорочну, чисту, Богу благоприятну, яко святитель очищен и душею и телом. Темже сый истинно Церкви предстатель и поборник сея, яко великий таинник Божия благодати.

## **Песнь 7**

**Ирмос:** Образу златому, на поле Деире служиму, трие Твои отроцы небрегоша безбожнаго веления, посреде же огня ввержени, орошаеми пояху: благословен еси, Боже отец наших.

**Святителю отче Николае, моли Бога о нас.**

Во острое искушение впадох, люте подстрекаемь, и ко вратом ада приближихся, скорбьми поражаемь, спаси мя молитвами твоими, блаженне, и возстави поюща: благословен еси, Боже отец наших .

**Слава:** Незаходимаго Света невещественными лучами облистаемь, сущия во тме скорбей озлобленныя исхити, и к просвещению веселия настави поющия: благословен еси, Боже отец наших.

**И ныне:** Моли Христа, Сына Твоего и Бога, Дево Богородительнице, проданныя лютыми прегрешеньми и лестьми змиинными, кровию Его честною избавитися поющим: благословен еси, Боже отец наших.

## **Песнь 8**

**Ирмос:** В пещь огненную ко отроком еврейским снизшедшаго, и пламень в росу преложшаго, Бога пойте, дела, яко Господа, и превозносите во вся веки.

**Святителю отче Николае, моли Бога о нас.**

Яко благ и сострадателен, во глубине напастей люте содержимыя свободи, блаженне Николае, от содержащих лютых разрешение подая молитвами твоими, яже ко Спасу Христу, священнотаинниче .

**Слава:** Тайновождь сущих паче ума, святых служитель и небесных сый, богомудре: архиерей же верен, прегрешений оставления проси от Спаса нашего, священноявленне.

**И ныне:** Изнемогает мой ныне ум, во глубину впад безчестия, яко отвсюду различными объят есмь злыми: но Ты, Дево, исцели, безстрастия светом одевающи.

## **Песнь 9**

*Ирмос:* Безначальна родителя Сын, Бог и Господь, воплощся от Девы, нам явися, омраченная просветити, собрати расточенная. Тем Всепетую Богородицу величаем.

**Святителю отче Николае, моли Бога о нас.**

Свещами благодати, богомудре, просвещаемь, и светильник благочестия яве был еси, сущия в напастех спасаеши, и сущия во глубине морстей избавляеши, и питаеши алчущия преславно, всеблаженне .

**Слава:** Иже в раи сладости ныне водворяся, и неизреченную славу ясно зря, от небесных круг певцы твоя назираеши, от страстей избавляя, богоносе всеблаженне.

**И ныне:** Премудрость, и Силу, и Слово ипостасное Отчее, Богомати Чистая, родила еси, от Твоих пречистых кровей свой Храм приемшую, и Сему по соединению соединившуюся нераздельно.

## **Величание**

**Величаем** ты, святителю отче Николае, и чтим святую память твою, ты бо молиши за нас Христа Бога нашего.